

四庫全書

子部

欽定四庫全書

子部

續名醫類案卷四十九

五十一

詳校官太醫院醫官臣姜晟

編修臣倉聖脈覆勘

總校官編修臣王燕緒

校對官中書臣劉源溥

謄錄監生臣陳 箴

欽定四庫全書

續名醫類案卷四十九

錢塘魏之琇撰

癰疽

李東垣治通父家翟種于尻脣上足太陽經生癰堅硬
腫痛大作左右尺脉俱緊按之無力羌活黃栢各二
錢防風葉本連翹各一錢肉桂七分甘草蒼朮陳皮
各五分當歸一錢黃芪一錢五分酒二大盞水一大

盞煎至一盞去渣熱服空心以夾被蓋覆其癰使藥行罷去之一服愈

子族叔父平生多慮質弱神勞年近五十忽右膊外側臙上生結核身微寒熱而易怒食味頗厚脉之俱弦大浮數而重似澁曰此多慮而憂傷血時在初秋勿輕視之宜急補以防變症以人參一斤作膏下以竹瀝病者吝費招一外科以十宣五香散間與服旬日後一日大風拔木病者發熱神思不佳急召視之核

稍高大似有膿于中起一紅線延過肩後斜走遠背
脊過入右脇下不痛覺肩背重而急迫食有嘔意脉
同前但弦多耳作人參膏入芎朮生薑汁飲之用人
參三斤瘡潰膿乾又與四物湯加參朮陳皮甘草半
夏生薑百餘帖而安此等若在春令雖神仙不治也
幸而在秋金之令不幸因時下暴風激起木中相火
而致此自非參膏驟補何由得免

朱郎年四十餘惡寒發熱右腿內臑厥陰分生一腫毒

此是冷折熱在肺經血分與此方萋仁黃藥子赤芍
歸頭條芩各三錢青皮角刺桂枝各二錢甘草節一
錢分四帖煎取一盞入忍冬藤汁二蛤殼食前飲以
忍冬藤查傳腫上

呂孺人惡寒發熱腹上有小疽此血少有熱與此方白
朮川芎各三錢赤芍連翹各二錢半陳皮防風黃芩
各二錢木通錢半甘草五分分五帖煎服

鄭經歷性嗜酒與煎燂年五十餘忽春末夏初患額上

作痛涌出一角長短大小如雞距稍堅求治曰此非
膏梁所致而何宜斷厚味先解食毒針灸以開泄壅
滯未易治也此少陽經所過氣多血少者鄭以憚煩
召他醫以大黃朴硝腦子等冷藥菴之一夕豁開如
醬蚘徑三寸一二日後血自蚘中濺出高數尺而死
此冷藥外逼熱鬱不得發宜其發之暴如此也

陳自明外科精要云神仙截法治癰疽發背一切惡瘡
預服則毒氣不入內真麻油一斤銀石器內熬十數

沸候冷用酒兩碗入油五盞通口熱服一日用盡緩則數日服之吳安世云吾家三世用之無有不驗又聞獵者云凡中藥箭急飲麻油藥毒即消鄭學諭德甫屢用之甚驗

薛立齋治一男子患癰腫硬疼痛發熱煩躁飲冷脉沈實大便秘乃邪在臟也用內疎黃連湯疎通之以絕其源先投一劑候行一次勢退一二再進一劑諸症悉退乃用黃連消毒散四劑而消

一男子膿熟不潰欲針之補以托裡不信乃服攻毒藥
反致惡心少食始悟而用針更以六君子湯加藿香
當歸四劑少可再以加味十全大補湯數劑而斂凡
瘡膿熟不行針刺膿毒侵蝕輕者難療重者不治老
弱之人或偏僻之處及緊要之所若一有膿宜急針
之更以托裡庶幾無變

一男子患毒作痛服寒涼藥痛雖止而食愈少瘡亦不
潰以六君子湯而食進再以托裡藥潰之而愈大抵

瘡疽之症寒熱虛實皆能作痛熱毒之痛者以寒涼
之劑折之寒邪之痛者以溫熱之劑散之因風而痛
者除其風因濕而痛者導其濕燥而痛者潤之塞而
痛者通之虛而痛者補之實而痛者瀉之膿鬱而閉
者開之惡肉侵蝕者去之陰陽不和者調之經絡閉
澀者利之慎勿槩用寒涼之藥况血脉喜濕而惡寒
若冷氣入裡血即凝滯反為難瘥矣

馮楚瞻治趙翁年七十二右頰腫硬連及頤項耳後一

片堅實不熱不痛已兩月餘諸治不效漸至口內出
膿牙噤不開飲食少進精神日衰脉則洪大而空知
血氣大虧陰寒所聚所謂石疽是也不得陽和何以
外解若內潰日久穿喉破頰不可療矣乃用猪脂搗
爛入肉桂細末葱頭食鹽杵勻厚敷患處數藥可法以脂
膏治血肉同氣相應也葱能透竅鹽能軟堅桂能行
血油能浸潤皮膚內則空心生脉飲送八味丸食遠
以參芪歸芍苓朮薄桂銀花角刺之類使陽回則陰

寒自解血氣冲和自能逐毒三五日後水硬者熱軟
漫腫者高聳木者疼痛紫者紅活飲食日進血氣漸
長毒既外出久凝久瘀之血肉消者消膿者膿不再
旬而愈

張景岳治一儒者年近三旬素病耳發必潰膿至是益
甚自耳根下連頸項上連頭角耳前後莫不腫痛或
與散風降火一月後稠膿鮮血自耳迭出每二三日
必出鍾許而腫痛全不消枕不可近察其形色已大

不足而腫痛則若有餘脉之或急或緩弱此非實熱
可知遂先與六味湯二三劑元氣稍振繼與一陰煎
加牛蒡茯苓澤瀉倍加白蒺藜為君服五十餘劑外
用降癰散晝夜敷治兩月而後愈蓋此症雖似潰瘍
有餘而實以肝腎不足上實下虛一奇症也何奇之有
張通府耳後髮際患腫一塊無頭肉色不變按之微痛
彼以為痰結診其脉軟而時見數經云脉數不時見
則生瘡也非痰結仲景云微弱之脉主血氣俱虛形

精不足又云沈遲軟弱皆宜托裡遂以人參白朮黃
芪當歸川芎炙艸以托裡少加金銀花白芷桔梗以
消毒彼謂不然內飲降火化痰外貼涼藥覺寒徹腦
患處大熱頭愈重飲食愈少復請治以四君子湯加
藿香炮乾薑數劑飲食漸進膿成刺之更以十全大
補湯去桂及灸以豆豉餅又月餘而愈

胡生耳後寸餘發一毒名曰銳疽焮痛寒熱煩躁喜冷
此膽經蘊熱而然先用神仙活命飲一劑勢減二三

時值仲冬彼惑于藥有用寒遠寒之禁故不再服自
用十宣散托裡之藥勢漸熾耳內膿潰復請治視其
喉腫閉藥不能下而歿

一婦人年逾四十近環跳穴生一毒尺脉沉緊腿不能
伸經曰脾寒移于肝癰腫筋攣夫脾主肉肝主筋肉
溫則筋舒肉冷則筋急遂與乳香定痛丸治之少愈
更以助胃壯氣血藥二十餘劑而削

一婦人脣傷次指成膿不潰焮痛至手誤敷涼藥以致

通炊微嘔少食彼以為毒氣內攻診其脉沉細此痛傷胃氣而然也遂刺之服六君子湯加藿香當歸食進更服八珍湯加黃芪白芷桔梗月餘而愈一後生亦患此色黑不痛其指已死欲令斬去速服補劑恐黑上臂不治彼不信另服敗毒藥手竟黑遂不救一男子亦傷拇指色紫不痛服托裡藥及灸五十餘壯作痛潰膿而愈吳舉人幼女因凍傷兩足至春發潰指俱壞遂去之服以大補藥而愈藍上舍女患嵌

甲傷指年餘不愈日出膿數滴謂足大指乃肝脾二
經發源之所宜灸患處使瘀肉去陽氣至瘡口自合
否則不治彼忽之不早治後變勞症而歿蓋至陰之
下血氣難到若女人患此又多因扎縛致血脉不通
或被風邪所襲則無氣血榮養遂成死肉惟當壯其
脾胃行其經絡生其血氣則愈其有成破傷風以致
牙關緊急口眼喎邪者先以玉真散一二服然後投
以通經生血之劑

于侍御髀胛患毒痛甚服消毒藥其勢未減即以槐花酒一服勢隨大退再以托裡消毒之藥而愈

立齋曰余丙子年忽惡心大椎骨甚痒須臾臂不能舉神思甚倦此天疽危病也急隔蒜灸之痒愈甚又明灸五十餘壯痒遂止旬日而愈精要云灸法有回生之功信矣大凡蒸灸若未潰則拔引鬱毒已潰則接補陽氣祛散寒邪瘡口自合其功甚大其法用大獨蒜切片如三錢厚貼疽頂上以艾炷安蒜片上灸之

每三壯一易蒜片若灸時作痛要灸至不痛不痛要
灸至痛方止大槩以百壯為度膿潰則以神異膏貼
之不日而安一能使瘡不開大二內肉不壞三瘡口
易合見效甚神丹溪云惟頭為諸陽所聚艾壯宜小
而宜少

王大廣年逾六十素厚味頰顙患毒未潰而肉先死脉
數無力此胃經積毒所致顙頰正屬胃經未潰肉死
則胃氣虛極老人豈宜患此辭不治果歿內經云膏

梁之變足生大疔受如持虛

黃履素曰予座師茅五芝先生長公子子京偶于腎間患一毒地非要害直易視之子京素知醫恐痛傷元氣輒服人參其毒愈甚發寒熱乃始延醫又遇粗工潰後胸懣應服參芪反不能多服竟致不能收口而歿蓋癰疽初起先宜瀉毒而後議補若補之太早遂有此禍可鑒也

邱汝誠面生疽即買藥鋪肆所合神芎散丸予之曰以

此療其人怒不肯服歸而告人人曰未必非良法也

服之即瘥蓋其人嗜酒此丸實去酒病云

揮塵新談

彭羨門少宰傳治腫毒初起方取鷄子用銀簪插一孔

用明透雄黃三錢研極細末入之仍以簪攪極勻封

孔入飯內蒸熟食之日三枚神效

居易錄

前寧都令李聘說麥粉不拘多少用陳醋熬膏貼無名

腫毒神效

全上

腦疽

薛立齋治一男子患腦疽其頭數多痛不可忍先服黃連消毒散不應更以忍冬酒服之即酣睡覺而勢去六七再四劑而消又一男子所患尤甚亦令服之腫痛頓退但不能平加以黃芪當歸瓜蒌白芷甘草節桔梗數劑而愈

舉人潘光甫年四十患腦疽焮腫診其脉沈靜謂陽症陰脉斷不起已而果然蓋瘡瘍之症雖屬心火尤當分表裡虛實果元氣充實內有實火者寒劑或可責

效若寒涼過度使胃寒脾弱症變陰或結而不潰潰而不斂陰陽乖戾水火交爭死無日矣

一老婦患腦疽稟壯實潰而痛不止脉實便秘與清涼飲二劑而痛止更以消毒托裡藥而愈

一老人患此色赤腫痛脉數而有力與黃連消毒散二劑少退更以清心蓮子飲四劑而愈

一男子患之腫痛脉數以黃連消毒散二劑少退以仙方活命飲二劑而止再以芎歸白芍銀花知栢而潰

又以托裡藥而愈

一男子頭項俱腫雖大潰腫痛益甚兼作瀉煩躁不睡
飲食少思其勢可畏診其脉毒尚在與仙方活命飲
二劑腫痛退半與二神丸及六君子湯加五味麥冬
棗仁四劑諸症少退飲食少進睡亦少得及與參苓
白朮散數服飲食頓進又與十全大補湯加銀花白
芷桔梗月餘而瘥

一老人色赤腫痛脉數而有力與黃連消毒散二劑少

退更與清心蓮子飲四劑而消

一婦人膿熟不潰脹痛欲嘔飲食少思急針之與托裡藥而愈一婦人患之不甚痛不作膿以托裡消毒散膿成針之補以托裡藥而愈

一老人膿清兼作渴脉軟而濇以為氣血俱虛用八珍湯加黃芪五味子彼不信乃服降火之劑果反作嘔少食始信服香砂六君子湯四劑嘔止食進乃投前湯月餘而愈

一男子未潰兼作渴尺脉大而無力以四物湯加知栝
麥冬黃芪四劑而渴減又與加味八味丸渴止瘡潰
更用托裡藥兼前丸而愈

一男子腫痛脉數以荆防敗毒散二劑而痛止更以托
裡消毒藥而消

一男子炊腫疼痛發熱飲冷脉洪數與涼膈散二劑而
止以金銀花散四劑而潰更以托裡藥而愈

一老婦稟實潰而痛不止脉實便秘以清涼飲二劑而

止更以托裡消毒藥而愈

一男子腫硬不作膿惟瘡頭出水痛甚以仙方活命飲
二劑痛止而膿成針之更以托裡藥而愈常治膿清
補而不應及不痛或木悶堅硬者俱不治

一男子膿將成微痛兼渴尺脉大而無力此陰虛火動
之症彼謂心經熱毒自服清涼降火藥愈熾復求治
乃以四物湯加知栢五味麥冬黃芪及加減八味丸
渴止瘡潰更以托裡藥兼前丸而愈中藏經云癰疽

瘡腫之作皆五臟六腑畜毒不流非獨榮衛壅塞而發其行也有處其主也有歸假令發于喉舌者心之毒皮毛者肺之毒肌肉者脾之毒骨髓者腎之毒發于下者陰中之毒發于上者陽中之毒外者六腑之毒內者五臟之毒故內曰壞外曰潰上曰從下曰逆發于上者得之速發于下者得之緩感于六腑者易治感于五臟者則難治也觀此則疽發于腦者乃膀胱督脉陰氣不足陽火熾甚而出也豈可專泥于心

火而不滋益陰氣耶

一男子耳後漫腫作痛肉色不變脉微數以小柴胡湯加芎歸桔梗四劑腫少起更以托裡消毒散數劑脉滑數此膿已成矣宜針之彼畏而不肯用因痛極始針之出膿椀許以托裡藥兩月餘始愈凡瘡不起者托而起之不成膿者補而成之使不內攻膿成而及時針之不數日即愈矣常見患者皆畏針痛而不肯用又有恐傷良肉而不肯用殊不知瘡雖發于肉薄

之所若膿成其腫亦高寸餘瘡皮又厚分許用針深
不過二分若發于背腫高必有三四寸入針止于寸
許况患處肉已壞矣何痛之有何傷之慮怯弱之人
及患附骨疽待膿自通以致大潰不能收斂氣血瀝
盡而亡者多矣

用針
之法

一男子素不慎起居飲食焮赤腫痛尺脉洪數以黃連
消毒散二帖濕熱頓退惟腫硬作痛以仙方活命飲
二帖腫痛悉退但瘡頭不消投十宣去桂加銀花葉

本白朮茯苓陳皮以托裡排膿彼欲全消自製黃連
消毒散二帖反腫硬不作膿始悟仍用十宣加白朮
茯苓半夏腫少退乃去桂又四劑而膿成腫勢亦退
繼以八珍散加黃芪五味麥冬月餘膿潰而愈夫苦
寒之藥雖治陽症尤當分表裡虛實次第時宜豈可
始末悉用之然焮腫赤痛尺脉數按之則濡乃膀胱
濕熱壅盛也故用黃連消毒散以解毒除濕腫硬作
痛乃氣血凝滯不行而作也遂用仙方活命飲以散

結消毒破血其瘡頭不消蓋因熱毒熏蒸氣血凝滯
而然也宜用甘溫之劑補益陽氣托裡以腐之況此
症原屬督脉經陰虛火盛而出若不審其因專用苦
寒之劑使胃寒氣弱何以腐化收斂幾何不致于敗
耶凡瘡之易消散易腐潰易收斂皆氣血壯盛故也
汪太常太夫人年逾八十腦疽已潰發背繼生頭如粟
許脉大無力此膀胱經濕熱所致夫脉無力乃血氣
衰也遂以托裡消毒藥數服稍可更加參芪之劑雖

起而作渴此氣血虛甚以人參黃芪各一兩當歸熟地各五錢麥冬五味各一錢數服渴止而不潰以前藥加肉桂十餘劑膿成針之瘀肉漸腐徐徐取去而膿猶清不斂投以大劑十全大補湯加白斂貝母遠志三十餘劑膿稠而愈凡患者氣質素實或有痰不服補劑不知膿血出多氣血並虛豈不宜補嘗治瘡陰用參芪大補之劑陽書敗毒之名與服之俱不中滿瘡亦有效虛甚者尚加薑桂及附子也

一男子患腦疽腫高作痛腫處敷藥痛雖止而色變黯腫外作痛仍敷之肉色亦黯喉內作痛不悟此為涼藥所誤反盡頸敷之其頸皆潰而死

朱丹溪治元杜清碧學道武夷至婺源病腦疽自治不愈朱往視之曰何不服防風通聖散清碧曰服數四矣朱曰盍以酒製之清碧乃悟服不盡劑而愈自此

心服丹溪

續醫說

竇材治一人病腦疽六日危篤不進飲食竇曰年高腎

虛邪氣滯經也令服救生湯即刻減半夜間再進一服全安

一老婦腦後作痛憎寒拘急竇曰此欲發腦疽也急服救生湯三服全愈

鬢疽

薛立齋治一男子患鬢疽焮腫作痛發熱以小柴胡湯加連翹金銀花桔梗四劑而消

一男子因怒後鬢際腫痛發熱以小柴胡湯加連翹銀

花花粉桔梗四劑根畔俱消惟瘡頭作痛以仙方活命飲二劑痛止膿成針之更以托裡消毒藥而愈

一男子頭面焮腫作痛時伸冬脉弦緊以托裡溫經湯汗之而愈

一男子腫痛寒熱拘急脉浮數以荆防敗毒散二劑表症悉退更以托裡消毒散潰之而安

一男子膿熟不潰脹痛針之而止更以托裡消毒散而愈凡瘡膿熟不潰屬氣血虛也若不托裡必致難瘥

一男子作膿焮痛發嘔少食以仙方活命飲一劑而止
以六君子湯加當歸桔梗角刺潰而愈

一男子膿清不斂以托裡散加五味麥冬而斂

一老人腫痛發熱膿清作渴脉輕而濇此血氣俱虛也
欲補之彼見作渴發熱乃服降火之劑果作嘔少食
復求治投六君子湯四劑嘔止食進仍用補藥月餘
而愈夫患者臟腑氣血上下各有虛實况陰症似陽
陽症似陰豈可以發熱作渴而槩用寒涼之劑常治

患者正氣虛邪氣實以托裡為主消毒佐之正氣實
邪氣虛以攻毒為主托裡佐之正氣虛邪氣實而專
用攻毒則先損胃氣宜先用仙方活命飲托裡消毒
散或用灸法俟邪氣退正氣復更酌量治之大抵正
氣奪則虛邪氣勝則實蓋邪正不並立一勝則一負
其虛不待損而自虛矣若發背腦疽疔毒及患在四
肢必用灸法拔引鬱毒以行瘀滯尤不可專于攻毒
診其脉而辨之庶不有悞

一男子腫焮痛甚發寒熱服十宣散愈熾診之脉數而實此表裡俱有邪也以荆防敗毒散加芩連大黃二劑少愈更以荆防敗毒散四劑而消大抵瘡瘍之症腫焮痛甚寒熱往來或大便秘結小便淋心神憤悶恍惚不寧皆邪熱之實也豈可補哉東垣云瘡疽之發其受之有內外之別治之有寒溫之異受之外者法當托裡以溫劑反用寒劑則是皮毛始受之邪引入骨髓受之內者法當疎利以寒劑反用溫劑托裡

則是骨髓之病上徹皮毛表裡通潰共為一瘡助邪為毒苦楚百倍輕則危殆重則死矣

趙宜人年逾七十患鬢疽已潰焮腫痛甚喜冷脉實大便秘溢東垣云煩躁飲冷身熱脉大精神昏悶者皆臟腑之實也遂以清涼飲一劑腫痛悉退更以托裡消毒藥三十餘劑而平若謂年高潰後投以補劑實實之禍不免矣

維揚俞黃門年逾三十冬月鬢患毒腫焮煩躁便秘脉

實此膽經風熱壅上而然也馬氏云瘡瘍之症壅壅而不利者大黃湯下之遂以一劑便通瘡退更以荆防敗毒散二劑再以十宣散去桂加花粉銀花數劑而愈大宗伯羅公耳後髮際患此焮痛脉數以小柴胡湯加桔梗牛蒡銀花四劑而愈

頤毒

薛立齋治高舉人年逾三十夏月熱病後患頤毒積日不消氣息奄奄脉診如無飲食少思大便不禁脉經

云脉息如無似有細而微者陽氣衰也齊氏云飲食不入大便秘利腸胃虛也遂以六君子湯加炮薑肉豆蔻破故脂數劑瀉止食稍進更加以黃芪當歸肉桂潰而膿水清稀就于前藥每服加熟附子一錢數劑食進膿亦漸稠再以十全大補湯用酒芍加白斂月餘而痊

項癰

薛立齋治二守施希祿患項毒膿已成因畏針焮延至

胸色赤如霞其脉滑數飲食不進月餘不寐肢體甚
倦此氣血虛而不能潰也乃針之膿出即睡覺而思
食用托裡藥兩月而愈劉璽素虛患此不針潰透頷
頰氣血愈虛竟不救

一婦人項患癰焮痛發寒熱以荆防敗毒散二劑少愈
以小柴胡湯加連翹牛蒡桔梗四劑而消

一男子項患毒潰而作痛以參芪地黃芎歸補之而止
更以八珍湯加黃芪桔梗三十餘劑而愈

馬元儀治沈氏婦頸項間患瘍痛甚躁煩發熱晝夜不眠多方不愈診之兩脉浮大沉小此陽明氣血交虧之候也陽明之氣一日一夜五十周于身而血隨之氣虛血溢則病生焉况所現皆血虛氣衰之症較之熱毒有餘者殊矣用黃芪一兩當歸五錢人參三錢炙草七分紅花五分調補氣血四劑而安

張子和在西華寄食於夏官人宅忽項上病一瘡狀如白頭瘡腫根紅硬以其微小不慮也忽故人見邀以

羊羔酒飲雞魚醢蒜皆在焉張以故舊不能辭又忘
禁忌是夜瘡大痛不可忍項腫及頭口開發狂言目
見鬼神夏君甚懼欲報其家張笑曰請無慮來日當
平乃以酒調通經散六七錢下舟車丸百餘粒次以
熱麵羹投之上涌下泄一時齊作各去半盞明日日
中瘡腫已平一二日膿出而愈

朱丹溪治王姑丈七十餘患項疽脉實而稍大此因憂
悶而生太陽經治之歸頭二錢黃柏一錢五分黃芪

羌活地黃酒苓桔梗各一錢酒連連翹防風生甘草
人參陳皮防已澤瀉各五分白水煎服

柴嶼青治夏同司鑲黃旗覺羅諱瑪德患對口人皆謂
之落頭疽難治柴以為無害服藥五十日而愈後某
公亦患前症亦服藥五十日而安

姚應鳳診一人項生瘡求治應鳳曰是天斫頭瘡宿因
也三年頭當自落而斃竟如其言

仁和縣志

肩癰

薛立齋治一男子肩患毒焮痛飲冷煩躁便秘脉數而實以清涼飲二劑少愈以金銀花散四帖悉退又以十宣散去桂加天花粉銀花數帖瘡潰而痊此脉與症皆有餘也

一婦人癸卯冬失物發怒缺盆內微腫甲辰春大如覆椀左肩胛亦腫肉色如故或針出鮮血三椀許腹痛如錐泄瀉不止四肢逆冷嘔吐惡寒或時發熱絕食已七日矣其脉洪大時或微細此陽氣脫陷也用六

君加炮薑三錢附子二錢早服至午不應再劑加附
子五錢熟睡覺來諸症頓退六七少進稀粥再四劑
諸症悉退飲食如故缺盆始痛針出清膿二椀許諸
症復至此虛極也以十全大補加薑桂附各一錢三
劑而安後減薑桂附各五分與歸脾湯兼服五十餘
劑而愈

上舍陳履學之內先從左肩下一點寒三日後右肩下
發一白腫如甌中紅如酒盞自用消解涼藥一劑不

散次投十宣散四劑加痛略紅次連投參芪丁桂防
芷之劑膿潰後惡心嘔吐頭暈不止厥逆寒戰鼓牙
虛汗頂平膿清此投解散涼劑之誤急洗去圍藥投
以參芪歸朮地黃薑附大劑一服原從左肩下舊寒
一點先熱起又進一服遍腫浮熱腫高膿稠魚絛烏
金膏數日出腐筋如脂膜大小數片日進前藥二服
參芪投至八錢踰兩月始安愈後時以勞厥即投參
芪歸朮薑附大劑乃甦

一男子肩患毒焮痛飲冷煩躁便秘脉數而實以清涼
飲二劑少愈以金銀花散四劑悉退又以十宣散去
桂加天花粉金銀花數劑瘡頭潰而痊

一婦人肩下患毒脉弦緊以白芷升麻湯二劑表症已
退更以托裡藥潰之而愈

一男子素弱肩患腫欲內消服涼藥反致作瀉少食以
二神丸及香砂六君子湯加肉豆蔻而瀉止食進又
以托裡藥而腫亦消

一男子肩下患疽已數日漫腫微痛頭甚多皆如粟許色不變不起發此氣血虛也診其脉果然先以仙方活命飲二劑殺其大勢更以托裡藥而起發瘡頭雖潰但流血水氣血尚虛不能為膿也彼欲服太乙錠子謂此藥止能攻毒不能托裡不信仍服之至四次飲食不進瘡色黑陷呃逆不絕胃氣虛極也不治強投溫中健脾之劑不應而死

一男子肩患毒腫硬作痛惡症迭見用白礬末三錢糊

丸以葱頭七莖煎湯調下腫痛悉去再服諸症亦退
更以仙方活命飲二劑出水而消此秘方名千金化
毒湯本礬末葱湯調服因末難服故易為丸一方士
治瘡疽不問腫潰先用此藥二三服後用消毒藥甚
效常治芻蕘之人用此即退不用托裡藥亦愈蓋止
熱毒為患血氣不虧故也若因金石毒藥發疽者尤
效蓋礬又能解金石之毒也一方用礬末五錢硃砂
五分熱酒下亦效此藥托裡固內止瀉解毒排膿不

動臟腑不傷氣血有益無損其藥易得其功甚大偏
僻之處不可不知此方或蟲犬所傷溶化熱塗患處
更以熱酒調末服皆效

福泉黃吏部肩患毒發熱惡寒大渴煩躁似有餘之症
其脉雖大而無力却屬不足用當歸補血湯治之愈
王喬年逾三十肩患毒以人參敗毒散一劑更以十宣
散去參桂加銀花花粉四劑而潰因怒動肝火風熱
上壅頭面赤腫焮痛飲冷以荊防敗毒散加苓連薄

荷二劑不應急砭患處出黑血盡許仍以一劑勢退大半再進人參敗毒散四劑而愈夫病有表裡上下之殊治有緩急攻補之異若不砭刺毒氣結于肉裡藥不能及焮腫日甚使投峻利之藥則上熱未除中寒已作必傷命矣

一上舍肩患疽脉數以槐花酒一服勢頓退再與金銀花黃芪甘草十餘服而平槐花治濕熱之功最為神速若虛寒之人不可過劑

王洪緒治姚氏女年二十九小產月餘左肩手搭處先發一毒周尺有五半月背添一毒上下長一尺三寸上濶下尖皆白陷十日後始延治勢甚篤連服陽和湯三劑能起坐五劑自能便溺十二劑其續發者全消先發之搭手亦消刺瘡頂如碁子大不痛而潰四日收功後云背上如負一版轉舒不快以小金丹十丸每日二進全愈

臂癰

薛立齋治進士申天益臂患癱寒熱頭痛形氣虛弱此
手足陽明經風熱邪之症用桔梗升麻湯二劑外邪
頓散用托裡消毒散二劑腫痛頓退乃用補中益氣
湯調理形氣漸復而愈

一婦人臂患腫惡寒不作膿以十宣散六劑而潰以托
裡散數劑而瘳

一婦人臂腫未成膿飲食少思遇勞作痛發熱以補中
益氣湯二劑痛少止以補氣血健脾胃藥而消

一婦人臂患毒腫硬咽喉壅塞四肢逆冷發寒熱以五香連翹湯二劑頓愈以瘡科流氣飲四劑而消

一男子臂患癰脉弦緊有力以白芷升麻湯二劑頓退又二劑而消

一男子臂患癰不作膿灸以豆豉餅及飲托裡藥三十餘劑而潰又月餘而瘳

一婦人患臂癰瘡口紫陷膿清不斂彼以為毒未盡欲服攻毒之劑謂瘡瘍之症腫起堅硬膿稠者實也腫

下軟慢膿稀者虛也遂用附子餅灸之及飲十全大補湯百劑始愈

西蜀彭黃門太安人臂痛數年服活絡丹二丸而瘥

可入痺

朱丹溪治從叔平生多慮質弱神勞年近五十忽左膊外側腫上起一小紅腫大約如粟曰慎勿輕視且先與人參大料作湯二三斤為好彼未之信慢進小貼數服未解而止旬餘值大風拔木瘡上起一道紅綫繞至背胛直抵右胛肋曰必大料人參少加川芎陳

皮白朮等補劑與之後與此方兩閱月而安

東垣曰尹老家素貧己酉歲十月初寒形志皆苦于手
陽明大腸經分出癱初有癩疔其臂外皆腫痛先腫
在陽明左右寸脉皆短中得之俱弦按之洪緩有力
此癱得自八風之變以脉斷之邪氣在表其症大小
便如故飲食如常腹中和口知味知不在裡也不惡
風寒止熱躁脉不浮知不在表也表裡既和邪氣止
在經脉之中內經曰凝于經絡為瘡癰其癰出身半

已上風從上受之故知是八風之變為瘡者也宜治其寒邪調其經脉中血氣使無凝而已以白芷升麻湯療之一服而愈灸甘草升麻桔梗白芷當歸稍生地黃生黃芩酒黃芩連翹黃芪中桂紅花右呔咀水酒各大盞半同煎服愈

薛治王揮使臂腫一塊不痛不赤惟脉弱懶食時嘔以六君子加藿香酒芍嘔止食進再以八珍湯二十餘劑成膿刺之又以十全大補而愈次年傷寒後此臂

仍腫微痛乃傷寒餘毒也無表症但虛弱先用十宣散四劑取參芪芎歸扶助元氣防風桔梗白芷厚朴行散腫結肉桂引經破血腫退三四再以八珍湯膿潰而愈至冬臂復作痛因服祛風藥反筋攣痛甚此血虛不能養筋筋虛不能束骨遂以加味十全大補而愈

一室女臂患腫潰久不斂寒熱交作五心煩熱飲食少思月水不通與逍遙散八珍湯經行瘡愈一婦人月

水不行潮熱咳嗽肌體日瘦胸膈不利頸腫一塊日
久不消亦服前藥熱退腫消經行而愈

宋瑛年逾三十臂患癰潰而不痛膿稀脉弱丹溪云疽
潰深而不痛者胃氣大虛而不知痛也東垣云膿水
清稀瘡口不合氣血俱虛也當以大補藥治彼不聽
服消毒藥氣血虛甚遂不救丹溪云纔見腫痛參之
脉症虛弱便與滋補氣血無虧可保終吉又云潰瘍
內外皆虛接補為主

王時亨年逾四十臂患毒焮痛作嘔服托裡消毒藥愈甚以涼膈散二劑頓退更以四物湯加苓連四劑而削王文遠臂患毒作痛服寒涼藥遂致食少大便不實以理中丸二服更以六君子湯加砂仁藿香治之再以托裡藥膿潰而愈大凡瘡痛甚者如稟厚有火則宜苦寒之劑若稟薄者則宜補中益氣湯加苓連之類在下加黃柏人肥而瘡作痛者用荆防羌獨之類蓋取其風能勝濕也

楊起簡便方云起臂生一疽膿潰百日方愈中有惡肉突起如蠶豆大月餘不消醫治不效因閱本草得劉涓子鬼遺方用烏梅肉燒存性研傅試之一日夜去其大半再上一日而平乃知世有奇方如此遂留心搜刻諸方始基于此方也

本草綱目

續名醫類案卷四十九

欽定四庫全書

續名醫類案卷五十

錢塘魏之琇撰

乳

薛立齋治一婦人因怒兩乳腫兼頭痛寒熱此肝經氣
症也用人參敗毒散二劑表症已退用小柴胡加芎
歸枳殼桔梗四劑而愈

一婦人因怒左乳作痛胸隔不利此屬肝脾氣滯以方

脉流氣飲加木香青皮四劑而安

一婦人久鬱左乳內結核如杏三月不消心脉澁脾脉
大按之無力此肝脾氣血虧損以八珍加貝母遠志
香附柴胡青皮桔梗五十餘劑而消

一婦人乳內結核年餘晡熱少食此氣血不足欲用益
氣養榮湯彼反服行氣之劑潰出清膿而歿又一婦
乳內結核如粟亦服前藥大如覆碗堅硬如石出血
水而歿又郭氏妻乃放出宮人乳內結一核如粟亦

以前湯彼不信乃服瘡科流氣飲及敗毒散三年後
大如覆椀堅硬如石出水不潰亦歿大抵鬱悶則脾
氣阻肝氣逆則成隱核不痛不痒人多忽之最難治
療若一有此宜戒七情遠厚味解鬱結更以養氣血
之藥治之庶可保全否則不救亦有二三載或五六
載方潰陷下者皆曰乳巖以其形巖凸似巖穴也最
毒慎之可保十中一二也

一婦人腫而不作膿以益氣養榮湯加香附青皮數劑

而膿成針之旬日而愈

一婦人右乳腫發熱急情嗜卧無氣以動至夜熱亦甚以補中益氣湯兼逍遙散治之而痊

一男子左乳腫硬痛甚以仙方活命飲二劑而止更以十宣散加青皮四劑膿成針之而愈若膿成未破瘡頭有薄皮剥起者用代針之劑點起皮處以膏藥覆之膿亦自出不若及時針之不致大潰如出不利更經搜膿化毒之藥若膿血未盡輒用生肌之劑反助

邪氣縱早合必再發不可不慎也

一男子年踰五十患子不立事左乳腫痛左脇脹腫肝
脉弦數而澁先以龍薈丸二服諸症頓退又以小柴
胡對四物加青皮貝母遠志數劑而膿成欲針之仍
以養氣血解鬱結彼不從乃雜用流氣敗毒之劑致
便秘發熱作渴復請治謂膿成不潰陽氣虛不能鼓
舞也便秘發熱陰血竭不能濡潤也辭不治果死
一男子因怒左乳腫痛肝脉弦數以復元通氣散二服

少愈以小柴胡湯加青皮芎歸數劑而消復元通氣散木香茴香青皮甲片陳皮白芷甘草漏蘆貝母各等分每服三錢溫酒調下

孫文垣姪婦素有痰涎胸膈痞脹近因乳腫大發寒熱欲成癰以加味神效瓜萸散二帖寒熱退而腫不消用貝母白芷為臣瓜萸為君赤芍當歸連翹為佐青皮甘草柴胡為使痛減腫仍不消脉之近數知已成膿乃與內托十宣散加銀花蒂丁二帖而膿潰因脚

上生瘡且有浮氣前方去蒂丁銀花加苡仁蒼耳子
調理全安

薛立齋治王汝道室年踰三十每怒後乳內作痛或腫
此肝火所致用小柴胡合四物加青皮桔梗香附枳
殼而愈彼欲絕去病根自服流氣飲遂致朝寒暮熱
益加腫痛此氣血被損而然與八珍三十餘劑喜其
年壯元氣易復得愈

一婦人乳內腫一塊如雞子大勞則作痛久而不消服

托裡藥不應此乳勞症也屬肝經血少所致先與神效瓜蒌散四劑更隔蒜灸之腫稍退再與八珍湯倍加香附夏枯草蒂丁仍間服前散月餘而消亦有乳疽一症其狀腫硬木悶雖破而不潰腫亦不消尤當急服此散及隔蒜灸法此乳腫症氣血為七情所傷亦勞症也宜戒惱怒節飲食慎起居否則不治

一婦人患乳癰氣血頗實但瘡口不合百治不應與神效瓜蒌散四劑少可更與數劑及豆豉餅灸之而愈

一婦人患此未潰亦與前藥三劑而消陳良甫曰婦人乳勞便服此藥可杜絕病根毒已成能化膿為水未成者則從大小便散之

一人抱疾小愈左乳復生癰繼又胸膈間結核其堅如石荏苒半載百藥不能施已而牽掣于肩痛楚特甚禱于張王祠夢問語曰但用生薑自然汁製香附服之可也比覺簡本草視之二物治症相符訪醫者張祿亦云有理用香附去毛薑汁浸一宿為末二錢米

飲調纔數服瘡膿流出腫硬漸消而愈

槎菴
小乘

朱丹溪治一婦人年六十厚味鬱氣而形實多妬夏無汗而性急急左乳結一小核大如棋子不痛自覺神思不佳不知食味經半月以人參湯調青皮甘草末入生薑汁細細呷一日夜五六次至五七日消矣此乃妳巖之始不早治隱至五年十年已後發不痛不痒必于乳下潰一竅如巖穴出膿又或五七年十年雖飲食如故洞見五內乃死惟不得于夫者有之婦

人以夫為天失于所天乃能生此謂之巖者以其如
穴之嵌呀空洞而外無所見故名曰巖患此者必經
久淹延惟此婦治之早正消患于未形餘者皆死凡
十餘人又治一初嫁之婦只與青皮甘草與之安

二孺人但經將行而乳腫先兩日發口乾而不渴食少
減脉左弦帶數右却平治用四物湯加陳皮白朮茯
苓帶熱下與點丸三十粒

義二孺人平時乳內有結核不為痛忽乳邊又有一腫

核頗却有些痛黃芩川芎木通陳皮各四錢人參二錢白芍一錢大腹皮三錢炙甘草生甘草各一錢當歸頭一錢分二帖煎服

楊孺人乳腫痛青皮石膏連翹角刺黃藥子當歸頭木通各一錢生甘草三分入好酒些少同煎飲又別藥洗腫處

李東垣治一婦人乳間出黑頭瘡瘡頂陷下作黑眼子其脉弦洪按之細小升麻連翹葛根各一錢牛肉桂

三分黃芪歸身甘草炙各一錢牛蒡五分黃栢二錢
水煎至一盞二服愈

立齋治一婦人患乳癰寒熱頭痛與荆防敗毒散一劑
更與蒲公英一握擣爛入酒二三盞再擣取汁熱服
查熱菴患處而消丹溪云此草散熱毒消腫核又散
滯氣解金石毒之聖藥

陳良甫云開慶間淦川嘉林曾都運恭人年已五十而
病妳癰癰^缺後果不起以此稱聖醫此妄說也癸亥年僕

處五羊趙經畧夫人年七十一歲隔一二年前左乳房上有一塊如鵝卵大今忽然作楚召子議藥僕云據孫真人云婦人年五十歲以上乳房不宜見癰見則不可治矣幸而未破恐是氣瘤漫以五香連翹湯去大黃煎服後稍減則已過六七年後每遇再腫脹時再合服必消減矣

良方

立齋曰一婦人乳內結核年餘不消口乾倦怠脉澁少食此肝脾二經血氣虧損之症宜培養為主乃用草

藥敷帖遂不救

繆仲淳治顧文學又善內人患左乳巖用夏枯草蒲公
英為君銀花漏蘆為臣貝母桑葉甘菊雄鼠糞連翹
白芷紫花地丁山茨菰炙艸瓜蒞茜根陳皮乳香沒
藥為佐使另用夏枯草煎濃汁丸之服斤許而消三
年後右乳復患用舊存餘藥服之亦消後以此治數

人俱效

廣筆記

馬銘鞠治沈姓婦患乳癰潰爛經年不見臟腑者一膜

耳用鼠糞土棟樹子

經霜者佳
川棟不用

露蜂房各三錢俱煨

存性各取淨末和勻每服三錢酒下間兩日一服痛

即止不數日膿盡收斂此方傳自江西販糖客因治

祝氏喉症得之

廣筆
記

張王屋屠後江孟修兄驗過乳癖方白芷一錢雄鼠糞

一錢二種晒乾為末用好酒調服飲取一醮睡而愈

雄鼠糞
尖者是

又一神驗方用活鯽魚一個山藥一段如魚

長同搗汁敷乳上以紙蓋之立愈

廣筆
記

薛治一婦人乳癰愈後發熱服養氣血藥不應與八珍湯加炮薑四劑而止仍以前湯加黃芪香附三十餘劑氣血平復

一婦年逾二十稟弱乳內作痛頭疼脉浮與人參敗毒散倍加人參一劑表症悉退但飲食少思日晡微熱更以小柴胡湯合六君子湯二劑熱退食進方以托裡藥加柴胡十餘劑針出膿而愈又一婦患此症膿成畏針病勢漸盛乃強針之膿出三椀許脉數發渴

以大補藥三十餘劑而愈丹溪云乳房為陽明所經
乳頭為厥陰所屬厥陰者肝也乃女子致命之地宗
筋之所且各有囊橐其始焮腫雖盛受惠止于一二
囊若膿成不針攻潰諸囊矣壯者猶可弱者多致不
救所以必針而後愈也

錢國賓治一婦人年五十六左乳患已七年爛過半矣
中間一孔如桃時流血水凡帖膏藥痛反增劇以布
圈繫護防其摩擦夫乳頭屬足厥陰肝乳房屬足陽

明胃乃肝胃二經之症非單方不足以治其外非峻
補不足以養其內以形色氣味治之用陳香椽一個
其穰之瓣如乳內之房其色先青而後黃青屬肝黃
屬胃其味先酸而後甘酸屬肝甘屬胃其氣香能通
肝胃之氣煨黑止血酒服和經此治其乳也製一枚
為末作二次服又用酒炒黃芪二兩益氣實表土炒
白朮二兩山藥五錢健脾收濕芎歸地芍各一錢養
血水六椀煎三椀作四次服調至一月痊

胸癰

薛立齋治一男子胸患癰腫高焮痛脉浮而緊以內托復煎散二劑表症悉減以托裡消毒解四劑而消

一男子素弱胸患癰飲食少而倦以六君子湯加芎歸黃芪膿成針之更以托裡藥而愈

一男子胸患癰焮痛煩燥發熱作渴脉數而實時季冬謂此熱毒內畜也須捨時從症欲治以內疎黃連湯彼以時當隆寒乃雜用敗毒藥愈熾仍求治投前湯

二劑後去二次諸症悉退以金銀花散加連翹山梔
四劑出水而消大抵症有主未治有權宜治其主則
未自退用其權則不拘于時泥于守常必致病勢危
甚况雜用攻劑動損各經故丹溪云凡瘡發于一經
只當求責本經不可干擾餘經羅謙甫云守常者衆
人之見知變者智者之事知常而不知變細事因而
取敗者多矣

一男子胸患毒焮痛喜冷脉洪數以黃連解毒湯二劑

頓退更以金銀花散六劑而消

一少婦胸膈間潰一竅膿血與口中所咳相應而出以

參芪當歸加退熱排膿等藥而愈

余按此因肺痿所致原注

張都憲夫人性剛多怒胸前作痛肉色不變脉數惡寒

經云洪數之脉應發熱而反惡寒瘡疽之謂也今脉

洪數則膿已成但體豐厚故色不變似乎無膿以痛

極始肯用針入數寸膿出數椀遂以清肝消毒藥治

之而愈設泥其色而不用針無可救之理矣

琇按肝脉挾胃貫膈又曰是所生病者為胸滿故
胸之癰疽本由于肝也

楊百戶胸患毒腫高焮赤發熱脉數大小便澁飲食如
常齊氏曰腫起色赤寒熱疼痛皮膚壯熱頭目昏重
氣血之實也又云大便硬小便澁飲食如故腸滿膨
脹胸膈痞悶肢節疼痛身熱脉大精神昏塞臟腑之
實也遂以黃連內疎湯二劑諸證漸退更以荆防敗
毒散加芩連山梔四劑少愈再以四物加芩連白芷

桔梗甘草銀花數劑而消

一男子胸腫一塊半載不消令明灸百壯方潰與大補藥不斂復灸以附子餅而愈

張路玉治談仲安體肥善飲初夏患壯熱嘔逆胸膈左畔隱痛手不可拊便溺澀數舌上滑胎食後痛嘔稠痰漸見血水脉來澀澀不調與涼膈散加石斛連翹下稠膩極多先是醫作肺癰治不效張曰肺癰必咳嗽吐腥穢痰此但嘔不嗽洵為胃病無疑下後四五

日復嘔如前再以小劑調之三下而勢甫平後以保元苓橘平調二十日而痊先時有李姓者患此專以清熱豁痰解毒為務直至膈畔潰腐膿水淋漓纏綿匝月而斃良因見機不早悔無及矣

琇按是症最難別白即內經所謂內有裹大膿血之症也吾鄉一名醫自患此同道診之不知為癰也雜進參附丁桂之劑久之吐出臭膿乃省已無及矣

脇癰

薛立齋治一婦人脇患癰未成膿惡寒脉緊以十宣散
加柴胡二劑表症悉退更以托裡散數劑膿清而愈
一男子近脇患疽腫而不潰投大補之劑潰而已愈後
患弱症而歿

一上舍年逾四十因怒脇內作痛不止數日後外結一
塊三寸許漫腫色不赤按之微痛此怒氣傷肝致血
傷氣鬱為患以小柴胡湯對四物倍用芎歸黃芪貝

母肉桂治之彼謂丹溪云腫瘍內外皆壅宜托裡表散為主又云凡瘡未破毒攻臟腑一毫熱藥斷不可用况此症為氣血凝滯乃服流氣飲愈虛始信而復求治視之虛症併臻診之胃氣更虛彼欲服薛前藥曰急者先治遂以四君子湯加酒芍炮薑四劑少得更加當歸又四劑胃氣漸醒乃去薑又加黃芪芍歸肉桂數劑瘡色少赤并微作痛又二十餘劑膿成針之却與十全大補湯喜其謹疾又兩月餘而瘳夫氣

血凝滯多因營衛之氣弱不能運散豈可復用流氣
飲以益其虛况各經氣血多寡不同心包絡膀胱小
腸肝經多血少氣三焦胆腎心脾肺少血多氣然前
症正屬膽經少血之臟人年四十以上陰血日衰且
肝症俱屬不足腫瘍內外皆壅宜托裡表散為主乃
補氣血藥而加以行散之劑非專攻之謂也若腫焮
痛甚煩躁脉大辛熱之劑不但腫瘍不可用雖潰瘍
亦不可用也凡患者須分經絡氣血地部遠近年歲

老幼稟氣虛實及七情所感時令所宜而治之常見以流氣十宣二藥槩治結腫之症以致取敗者多矣

此案與舊案東侍御一則正同而此之發明最為緊要而舊案節之故重錄于此

馬元儀治沈氏婦左脇患腫瘍長五寸許治已兩月發表托裡劑多功少診其兩脉弦數兼澁腫處低陷作痛寒熱經行不止口燥艱食此症頗危必得之勞鬱且怒邪熱結聚厥陰之位榮衛不行周身火邪獨徹上下表斂俱所不宜用生首烏一兩滋其內燥柴胡

一錢踈其氣鬱枳殼桔梗各一錢舒通肺氣以制肝
木杏仁蘇子各二錢調氣化痰以清上焦丹皮一錢
清其血牛麴一錢和其中兩劑寒熱減而經止患處
焮腫潰出稠膿飲食少進瘍醫以潰後當行大補投
芪朮之屬復致瘡口內陷食少曰癰疽已潰當補此
其常耳今兩脉遲澁遲則氣阻澁則血滯鬱而得補
其鬱彌甚始猶肝木自傷既乃轉戕脾胃以缺不循常
度分肉不溫經隧不行而欲瘡之斂也其可得乎夫

榮衛不通須以血藥和之當歸桃仁紅花延胡索是也
白朮枳殼一補一瀉所以推陳氣而致新氣乾薑煖
胃而和血查肉消滯而和中服二劑復大潰出稠膿
椀許食進神旺而安

朱丹溪診李兄年四十餘而面稍白神甚勞忽脇下生
一癰腫如桃一人教用補劑衆笑且排于是流氣飲
十宣散雜而進之旬餘召視之曰非惟不與補藥抑
且多得解利血氣俱憊不可為矣已而果然

立齋曰一男子因怒左脇腫一塊不作痛脉澁而浮此
肝經邪火熾甚而真氣不足為患宜培養氣血為主
乃用草藥敷帖遂致不救

一男子因勞發熱脇下腫痛脉雖大而按之無力此氣
血虛腠理不密邪氣襲于肉裡而然也河間云若人
飲食疎精神衰氣血弱肌肉消薄榮衛之氣短促而
澁滯故寒薄腠理而癰腫也當補之以接虛怯之氣
遂以補中益氣湯加羌活四劑少可去羌活又十餘

劑而愈又一男子年二十遍身微痛腰間作腫痛甚
以前藥加茯苓半夏並愈

一朝士腹脇間病疽經歲或以地骨皮煎湯淋洗出血
一二升家人懼欲止之病者曰疽似少快更淋之出
五升許血漸淡乃止以細穰貼之次日結痂愈

全上

馬刀

張子和治襄陵馬國卿左乳二肋間期門穴中發瘡硬
而不潰痛不可忍瘍醫皆曰乳癰或曰紅絲漏或曰

覩心瘡使服內托散百日又服五香連翹湯數月皆無驗張曰此馬刀也足少陽膽經之病出靈樞十二經以示之其狀如馬刀故曰馬刀堅而不潰乃邀之于食肆中使食水浸湯餅稍覺緩次日先以滄鹽上涌又以涼劑滌去熱勢約十數行腫已散矣

朱葛黃家妾左脇病馬刀憎寒發痛已四五日矣張曰此足少陽膽經病也少血多氣堅而不潰不可急攻當以苦劑涌之以五香連翹湯托之既而痛止然瘡

根未散有一醫者過見之曰我有妙藥可潰而為膿
不如此何時而愈既經毒藥痛不可忍外寒內嘔血
不止大便秘色食飲不下號呼悶亂幾至于死再求
治張曰脇間皮薄肉淺豈可輕用毒藥復令洗去以
涼劑下之痛立止腫亦消

腋癰

薛立齋治一童子腋下患癰久不斂膿清脉大倦怠頗
食少寐自汗口乾以內補黃芪湯及豆豉餅灸之兩

月而愈凡瘡膿潰而清或瘡口不合或聚腫不赤肌寒肉冷自汗色脫者皆氣血俱虛也非補不可

一男子腋下患毒效逆不食腸鳴切痛四肢厥冷脉細以托裡溫中湯二劑頓愈更以香砂六君子湯二神丸而飲食頓進以十全大補湯二十餘劑而斂

里中有周七者少年曾患毒左脇下得一異方用糯米炊飯乘熱入鹽塊夾葱管少許搗極爛如膏貼患處輒消至中年腰間忽生一毒熱如火板硬痛不可忍

偃僂跼躄自分必死屢藥不效急思前方如法貼之

未幾大便去糞如宿垢甚多硬者漸軟數日而起

廣筆記

薛立齋心法云河南張承祖年逾二十腋下患毒十餘

日腫硬不潰脉弱時嘔謂腫硬不潰脉弱乃陽氣虛

嘔吐少食乃胃氣弱先以六君子湯加藿香砂仁治

之彼謂腫瘍時嘔當作毒氣攻心治之潰瘍時嘔當

作陰虛補之曰此丹溪大槩之言也即諸痛痒瘡皆


屬心火之意假如赤腫痛甚煩躁脉實而嘔為有餘

法當下之腫硬不痛不潰脉弱而嘔為不足法當補之亦有痛傷胃氣或感寒邪穢氣而作嘔者雖腫瘍尤當助胃壯氣彼執不信用攻伐之藥病愈甚復請診其脉微細而發熱謂熱而脉靜脫血脉實汗後脉躁者皆難治後果然夫腫瘍毒氣內侵作嘔十有一二潰瘍濕氣內侵作嘔十有八九豈可混為一途

朱文鼎母因忿鬱膈下結一核二十餘年因怒加腫痛完穀不化飲食少思東垣云瀉利不止飲食不入此

腸胃虛也遂以六君子湯加砂仁肉桂乾薑肉豆蔻
瀉雖止而膿清瘡口不合氣血俱虛也以十全大補
湯月餘而愈

一男子年逾五十腋下患毒瘡口不合右關脈數而渴
此胃火所致用竹葉黃芪湯遂止再用補氣藥而愈
嘗治午後發渴或發熱用地骨皮散亦效



續名醫類案卷五十

欽定四庫全書

子部

續名醫類案卷五十二

詳校官太醫院醫官臣姜晟

編修臣倉聖脈覆勘

總校官編修臣王燕緒

校對官中書臣劉源溥

謄錄監生臣陳箴

欽定四庫全書

續名醫類案卷五十一

錢塘魏之琇撰

發背

精要論背疽其源有五一天行二瘦弱三怒氣四腎氣虛五飲冷酒食博服丹藥

元末嘉興桐鄉縣後朱村徐通判素慕洞賓朝夕供禮
一日疽發於背勢垂死猶扶起禮之如昔偶見淨水
盂下白紙一幅視之有詩云紛紛墓土黃金屑片片
花飛白玉芝君主一片臣四兩調和服下即平夷意

其仙方然不知何物為黃金白玉乃召仙以大黃白
並為問仙曰然服之果驗後以之醫人無不效徐無
子方竟傳婿沈氏至今沈以此治生數百里來貨藥
者無虛日族大而分數十家惟嫡枝居大椿樹下者
藥乃驗沈子嘗從吾友俞院判學嘗聞其藥今加穿
山甲當歸鬚金銀花矣然大黃既多以下為主不問
陰陽之毒而投之恐亦有害者然源源往醫又獨於
椿樹者驗豈非天固與之乎

七修類稿

京師萬勝門刺員王超忽覺背上如有瘡隱起倩人看
之已如盞大其頭無數或教往梁門裡外科金龜兒
張家買藥張視嚙眉曰此瘡甚惡非藥所能治只有
灼艾一法庶可冀望萬分然恐費力乃撮艾與之曰
且歸試灸瘡上只怕不疼直待灸疼方可療耳灼火
十餘殊不知痛妻守之而哭至第十三壯始大痛四
旁惡肉捲爛隨手墮地即似稍愈再詣張付藥敷貼
日安則知癰疽發於背脇其捷法莫如火也

類編

王敏診一人發背不起醫言起則治矣敏曰是擊指脉
即起亦不治衆劫以艾疽起如粟衆曰無傷矣竟三

日死

姑蘇志

治發背腦疽一切惡瘡初覺時採獨科蒼耳一根連葉
帶子細剉不犯鐵器用沙鍋熬水二大椀熬及一半
瘡在上徐徐飯後服之吐出候吐定再服以盡為度
瘡在下空心服瘡自破出膿更不潰引瘡上別以膏
藥傳之此方京兆張伯玉家勝示傳人後昆仲皆登

第人謂善報

元道山續
夷堅志

大凡石類多主癰疽世傳麥飯石膏治發背瘡甚效乃
中岳山人呂子華秘方裴員外啖之以名第河南尹
脅之以重刑呂寧絕榮望守死不傳其方取此石碎
如碁子炭火燒赤投米醋中浸之如此十次研末篩
細入乳鉢內用數人更碾五七日要細膩如麵四兩
鹿角一具要生取連腦骨者其自脫者不堪用每二
三寸截之炭火燒令烟盡即止為末研細二兩白斂

生研末二兩用三年米醋入銀石器內煎令魚目沸
旋旋入藥在內竹杖子不住攪熬一二時久稀稠得
所傾在盆內待冷以紙蓋收勿令塵入用時以鵝翎
拂膏於腫上四圍赤處盡塗之中留錢大洩氣如未
有膿即內消已作頭即撮小已潰即排膿如湍水如
病久肌肉爛落見出筋骨者即塗細布上貼之乾即
易逐日瘡口收斂但中隔不穴者即無不瘥已潰者
用時先以猪蹄湯洗去膿血故帛挹乾乃用藥其瘡

切忌手觸動嫩肉仍不可以口氣吹風及腋氣月經
有孕人見之合藥亦忌此等初時一日一洗一換十
日後二日一換此藥要極細方有效若不細塗之即

極痛也此方千金月令已有之但不及此詳悉耳

本草綱目

馮楚瞻治蔣司農向來脉氣寸強尺弱故服八味丸已

有年矣

此等脉多陰虛火上炎之候凡久服八味丸者多貽後患

然過勞藥力不

能勝其妄動之火鼻衄大作調理雖愈而口渴殊甚

飲湯水如甘露然即數十杯不足滿其欲也

此即消渴久成

癰疽 勸服大劑壯水佐以引火歸原之餌則水升火降

消渴自除癩症可弭乃忽之雖服數劑渴畧減藥即
停至初夏背上忽隱隱痛痛漸甚而肉硬半月餘痛
極重極診之當脊少偏半寸外不腫肉分堅實如椀
大矣日久渴不治陰水日虧陰火日熾書有腦疽背
疽之兆也亟為托出陽分使毒氣勿致逗遛內陷為
要乃外用大黃二兩芙蓉葉赤芍各一兩白芨白斂
各五錢為末鷄子清調敷毒四圍內則重滋陰水如

熟地山藥土貝角刺天蟲甲片生甘草連翹金銀花
之類及腫既成乃早吞八味丸五六錢以培先天之
水火食遠服參芪歸芍朮草銀花甲片天蟲角刺白
芷之類以助後天之氣血外以太乙膏加男髮草麻
子乳香沒藥煎膏貼之以呼毒氣外出不旬日紅腫
消痛重減瘡已焮高已有膿勢乃一外科改絃易轍
幾至內潰再亟治仍用前法煎藥加肉桂錢許仍高
腫紅活竟如此小之毒潰膿而愈

高鼓峰治一鄉人患發背上距風府下連腎俞通塊腫起肌肉青冷堅硬如鐵飲食俱廢不省人事醫猶用解毒藥脉之六部細數氣血大虧毒將內陷矣急用養榮湯加附子炮薑三大劑而胃氣開十劑而堅硬者散去十之八九只左邊如茶鍾大焮紅作痛戒之曰切莫箍藥及刀針氣血溫和毒當自出箍則反遲非時而刺收口難矣彼以不任痛竟受刺出血曰當倍前藥急服以收口為度仍戒以節嗜慾慎飲食兼

服還少丹八味丸而愈

朱丹溪曰予見吳兄厚味氣鬱而形實性重年近六十
患背疽醫與他藥皆不行惟香附末飲之甚快始終
只此一味腫潰恃此以安此等體實而又病實乃瘥

十百而一見者也

名獨勝散惟氣滯
血凝實症宜之

樓氏婦早寡善飲啖形肥偉性沉毒年六十六七月間
生背疽近正春醫遂橫直裂開取血雜以五香十宣
散與酒飲之月餘未嘗議其寡居之鬱酒肉之毒執

著之滯時令之熱至於平陷淹延兩三月而不救

江陵府紫極觀掘得石碑載此凡人發背欲結未結赤

紅腫痛先以濕紙覆其上立視候之其紙先乾處則

是結癰頭也取大蒜切成片如當三錢厚安頭上用

大艾炷灸之三壯即換一蒜片痛者灸至不痛時住

不痛者灸至痛時方住最要早覺早灸為上

如有頭
似麻豆

天者不須用
濕紙覆法

若有十數頭作一處生者即用大蒜研

成膏作薄餅鋪頭上聚艾於餅上燒之

一二日十灸
十活三四日

六七活五六
日三四活

王蘧發背方序云元祐三年夏四月官京師疽發於背
召國醫治之逾日勢益甚得徐州蕭縣人張生以艾火
加瘡上自旦及暮凡一百五十壯知痛方已明日鑷
去黑痂膿盡潰肉裡皆紅亦不復痛始別以膏藥貼
之日一易焉易時旋剪去黑爛月許瘡乃平是歲秋
夏間京師士大夫病疽者七人余獨生此雖司命自
然固有料理不知其方遂至不幸者以人意論之可

為慨然於是撰次前從所得方模版以施庶幾古人

濟衆之意

此即當頭灸法
但不用蒜耳

史源母氏背髀間微痒視之有赤半寸許方有白粒如粟黍乃急著艾灸其赤隨消二七壯而止信宿復覺微痛視之有赤下流長二寸濶如韭葉舉家皆以前灸為悔或云等慈寺尼智全者前病瘡甚大得灸而愈奔問之全曰劇時昏不知但小師輩言范八奉議守定火八百餘壯方甦約艾一節耳亟歸白之見從

始以艾作炷如銀杏大灸其上十數殊不知痛乃截
四旁赤引其炷減四之三皆覺痛七壯後覺痒每一
壯燼則赤隨縮入灸至二十餘壯赤暈收退病者不
憚遂以艾作團大灸其上漸加至鷄黃大約四十團
方覺痛視火焦處已寸餘蓋灸之遲而初發處肉已
壞壞肉成隔直至好肉方痛四旁知痛肉未壞也病
者六夜不寐至是食粥安寢至晚視之瘡如覆一甌
突高三四寸上有百數小竅色正黑突然高者毒氣

出外而聚也百數小竅者毒未聚而浮攻肌膚也色正黑者皮與肉俱壞也非灸火出其毒於壞肉之裡則五臟逼矣

薛立齋治王通府患發背十餘日勢危脉大先與槐花酒二服殺退其勢更以敗毒散二劑再以托裡藥數劑漸潰又用桑柴燃灸患處每日灸良久仍以膏藥貼之灸至數次膿潰腐脫以托裡藥加白朮陳皮月餘而愈

劉大尹發背六七日滿背腫痛勢甚危與隔蒜灸百壯
飲槐花酒二椀即睡覺與托裡消毒藥干去五六令
以桑枝灸患處而潰數日愈凡灸及飲槐花酒則托
裡之效甚速

一園丁患發背甚危令取金銀藤五六兩搗爛入熱酒
一鍾絞取酒汁溫服查菴患處四五服而平彼用此
藥治瘡足以養家遂棄園業諸書云金銀花治瘡瘍
未成者即散已成者即潰有回生之功

太監劉闕患發背腫痛色紫診其脉息沉數陳良甫云脉數發熱而痛者發於陽也且瘡瘍赤甚則紫即火極似水也詢之嘗服丹石藥半載乃積溫成熱所致遂以內疎黃連湯再服稍平更用排膿消毒藥及猪蹄湯太乙膏而愈經曰色與脉當相參應治之者在明亢害承制之理陰陽變化之機焉耳

一男子年逾五十患發背色紫腫痛外皮將潰寢食不安神思甚疲用桑柴火患處出黑血即斲睡覺而諸

症如失服仙方活命飲二劑又灸一次膿血皆出更
進二劑腫痛大退又服托裡消毒散數劑而斂夫瘡
毒熾甚未宜峻劑攻之但年老血氣衰弱况又發在
肌表若專於攻毒則胃氣先損必反誤事

吳江申僉憲患背疽堅硬脉沉實乃毒在內用宣毒散
大黃五錢煨白芷五錢水煎食前服一劑大小便下
汚物再服而消此方乃宣通攻毒之劑脉沉實便秘
者其功甚大

琇按即首條黃金白玉之方薛用之而不詳其出處
大尹陳國信素陰虛背患疽用參耆大補而不斂內勢
發熱舌燥唇裂小便頻數口乾飲湯嘔吐瀉利耳
閉目盲仰首眩暈脉浮大而數薛曰瘡口不斂脾土
敗也舌燥唇裂腎水枯也小便頻數肺氣衰也內熱
發熱虛火上炎也口乾飲湯真寒之象也嘔吐瀉利
真火衰敗也耳閉目盲肝木枯敗也仰首眩暈腎氣
絕也辭不治後果沒

琇按不拘內外病凡陰者服參芪諸氣分藥非惟無益而反害之據此症純屬三陰虧竭若初時解用二地二冬杞子歸芍之輩若可挽也

吳庠史邦直之內仲夏患背疽死肉不潰發熱痛甚作嘔少食口乾飲湯脉洪大按之如無此內直寒而外假熱當捨時從症先用六君加炮薑肉桂四劑飲食頓進諸症頓退復用十全大補湯仍加薑桂之類五十餘劑而死肉潰又五十餘劑而新肉生斯人血氣

充盛而瘡易起易斂使醫者逆知預為托裡必無此患
南儀部賀朝卿陞山西少參別時見其唇鼻青黑且時
搔背問其故曰有一小瘡耳與視之果疽也此脾胃
敗壞為不治之症薛素與善悲其途次不便殯殮遂
托其僚友張東沙輩強留之勉與大補但出紫血虛
極也或謂毒熾不能為膿乃服攻毒藥一鍾以致嘔
逆脉脫果卒於南都

京兆柴黼菴仲夏患之色黯微腫發熱煩躁痰涎自出

小腹陰實手足逆冷右關浮澁兩尺微細曰此虛寒之症也王太僕云大熱而不熱是無火也決不能起懇求治之用大溫補藥一劑流涎雖止患處不起終不能救

憲副屠九峯益春患此色黯漫腫作渴便數尺脉洪數此腎水乾涸當歿於火旺之際不信更用苦寒之藥復傷元氣以促其歿

一男子不慎房勞背胛腫高三寸許濶經尺餘自汗盜

汗內熱發熱口乾飲湯脉浮大按之弱澁此陰虛氣
節為患用十全大補加五味麥冬山萸山藥四劑諸
症悉退後乃別用流氣飲一劑虛症悉具腫硬如石
仍以前藥六劑始得愈

一儒者背腫一塊按之則軟肉色如故飲食如常勞則
吐痰體倦此脾氣虛而痰滯用補中益氣加茯苓半
夏少加羌活外用陰陽散以薑汁調搽而消後因勞
頭暈作嘔仍以前藥去羌活加生薑蔓荊子而愈

節推王器之背患疽瘡頭如黍焮痛背重脉沉而實此
毒在內服黃連內疎湯二劑少退更與仙方活命飲
而愈

舉人劉華甫焮腫作痛脉浮而數此毒蓄於經絡用內
托復煎散二劑而焮腫減用仙方活命飲四劑而腫
痛止更用托裡藥而愈

一儒者患背疽腫焮痛甚此熱毒蘊結而熾盛用隔蒜
灸而痛止服仙方活命飲而腫消更與托理藥而潰愈

一男子患背疽腐肉雖潰而新肉不生此毒氣解而脾胃之氣虛也用六君子加芎歸五味黃芪漸愈用十

全大補湯全愈

一男子背患疽腫痛赤暈尺餘背如負石其勢當峻攻其脉又不宜遂用遂砭赤處出紫血椀許腫痛頓退更用神功散及仙方活命飲二劑瘡口及砭處出血水而消

一男子背患疽肉腐膿清肌肉不生此邪去而氣血俱

虛也用十全大補湯月餘而斂

通府張廷儀背患疽作嘔焮痛大便秘結口乾作渴此
內蘊熱毒用竹葉石膏湯二劑諸症頓退用托裡消
毒散四畔腫消用仙方活命飲瘡亦尋愈

一男子背瘡潰而瘀血不散此陽氣虛弱也用參芪歸
朮峻補更以桑枝灸又用托裡散加肉桂瘡口自斂
此補接陽氣之法也

一男子背瘡漫腫微痛食少體倦此症屬形病俱虛法

當補元氣為主彼不信乃用攻毒之劑中央肉黯五寸許惡症悉具復求治曰此胃氣虛寒而變症作矣當急溫補脾胃則惡症自退黯肉自生仍不信乃割死肉祛惡症遂致不起

水部曹文兆背胛患之半月餘瘡頭如粟且多內痛如刺其脉歇止此元氣虛而疽蓄於內非灸不可遂灼二三十壯飲以六君加藿香歸數劑瘡勢漸退內痛頓去胃脉漸至但瘡色紫瘀肉不潰此陽氣虛也燃

桑枝灸患處以解散其毒補接陽氣仍以前藥加參
芪歸桂色赤膿稠瘀肉漸腐兩月而愈夫邪氣沉伏
真氣怯弱不能起發須灸而魚大補若投以常藥待
其自潰鮮有不誤者

黃汝耘患發背用生肌散太早益潰大便泄瀉其脉微
緩此脾胃虛先用二神丸以止其瀉次用大補藥以
固其本更用猪蹄湯洗患處用黃芪末以塗其外喜
其初起曾用艾灸毒不內攻兩月而愈

許鴻臚發背十餘日腫硬木悶肉色不變脉沉而實此
毒在內先以黃連內疎湯更以消毒托理藥其毒始
發奈欲速愈急用生肌藥患處如負石身如火焮遂
致不起

李氏云龍游有患背疽者大潰五臟僅隔膜耳自謂必
死用鯽魚去腸實以羯羊糞烘焦為末乾摻之瘡口
自收此出洪氏方屢用有效故附於此須候膿少欲

生肌肉時用之耳

陳白明外科精要

江陰舉人陳鳴岐寓京患背疽用大補之劑而愈翌日
欲回先期設席作謝對談如常是晚得家信大拂其
意惱怒遂發熱作渴食梨子少許至夜連瀉數次早
促薛視脉已脫矣竟至不起夫梨者利也疏利下行
之物凡脾胃虛寒產婦金瘡者皆當忌之

琇按其人瘍初愈元氣未復因怒而動厥陽之火
致發熱作渴其肝木之蹶張不待言矣未盛尅土
非嘔即瀉少許梨子何遽爾爾

陳自明治一男子患發背瘡頭如粟重如負石以神仙
太乙丹內服外塗後去三四次每去肛門如灸不日

而瘳

云見
瘳門

一婦人腫痛發熱睡語脉大用清心湯一劑而安以金
銀花甘草天花粉當歸瓜蒌黃芪數劑漸潰更以托
裡藥愈

一男子已愈惟一眼翻出努肉如血

即名
花瘡

翻三月不愈

乃傷風寒也以生豬脂調藜蘆末塗之即愈亦有努

出五寸許者尤宜用此藥也烏梅塗之亦效但緩疏黃亦可

一男背患毒焮痛飲冷發熱多汗便秘譫語以破棺丹二丸而寧以金銀花散四劑膿成開之更用托裡藥而愈

一婦膿成脹痛不安針之投托裡消毒藥即愈大抵發背之症雖發勢疼痛形勢高大煩渴不寧脉若有力飲食頗進可保無虞其膿一潰諸症悉退多有因膿

不得外泄以致疼痛若用敗毒寒涼次之反致誤事
若有膿急針之膿一出苦楚即止膿未成而熱毒作
痛者用解毒之藥亦有腐潰尺餘者若無惡症投以
大補之劑肉最易生亦無所妨惟忌腫不高色不赤
不炊痛脉無力不飲食腫不潰腐不爛膿水清或多
而不止肌肉不生屬元氣虛也皆難治宜峻補之其
或膿血既泄腫痛尤甚膿水敗臭煩躁時嗽腹痛渴
甚瀉利無度小便如淋乃惡症也皆不治

一弱婦外皮雖腐內膿不潰脹痛煩熱不安謂宜急開之膿一出毒即解痛即止諸症自退待其自潰不惟疼痛潰爛愈深彼不從待將旬日膿尚未出人已痛疲矣雖針之終不能收斂竟致不起

一男子潰而瘀肉不腐欲取之更以峻補一婦素弱未成膿大痛發熱謂須隔蒜灸以拔其毒令自消皆不從俱致不救常治不問日期陰陽腫痛或不痛或痛甚但不潰者即與灸之隨手取效勢未定者先用箍

藥園之若用烏金膏或援生膏貼患處數點尤好若
頭痛拘急乃表症先服人參敗毒散一二劑如焮痛
發熱脉數者用金銀花散或槐花酒神效托裡散如
疼痛腫硬脉實者以清涼飲仙方活命飲苦參丸腫
硬木悶疼痛發熱煩躁飲冷便秘脉沉實者內疎黃
連湯或清涼飲大便已利欲其作膿用仙方活命飲
托裡散蠟礮丸外用神異膏如飲食少思或不甘美
用六君子湯加藿香連進三五劑更用雄黃解毒散

洗患處每日用烏骨塗瘡口處俟有瘡口即用紙作
摺蘸烏金膏絀入瘡內若有膿為脂膜間隔不出
或作脹痛者宜用針引之腐肉堵塞者去之若瘀肉腐
動用猪蹄湯洗如膿稠或痛飲食如常瘀肉自腐用
消毒與托裡藥相兼服之仍用前二膏塗貼若腐肉
已離好肉宜速去之如膿不稠不稀微有疼痛飲食
不甘瘀肉腐遲更用桑柴灸之亦用托裡藥若瘀肉
不腐或膿清稀不炊痛者急服大補之劑亦用桑木

灸之以補接陽氣解散鬱毒常觀患疽稍重未成膿者不用蒜灸之法及毒熱不開或待腐肉自去多致不救大抵氣血壯實或毒少輕者可假藥力或自腐潰怯弱之人熱毒中隔內外不通不行針灸藥無全功矣然此症若膿已成宜急開之否則重者潰通臟腑腐爛筋骨輕者延潰良肉難于收功因而不斂者多矣

一男子年逾五十患已五日焮腫大痛赤暈尺餘重如

負石勢熾甚當峻攻察其脉又不宜遂先砭赤處出
黑血椀許腫痛頓退背重頓去更敷神功散及服仙
方活命飲二劑瘡口及砭處出血水而消大抵瘡毒
勢甚若用攻劑怯弱之人必損元氣因而變症者衆矣
一婦人半月餘尚不起發不作膿痛甚脉弱隔蒜灸二
十餘壯而止更服托裡藥漸潰膿清而瘀肉不腐以
大補藥及桑柴灸之漸腐取之而尋愈常治一人至
四五日未成膿而痛者灸至不痛不痛者灸至痛若

灸而不痛或麻木者明灸之毒氣自然隨火而散腫硬不作膿焮痛或不痛或微痛瘡頭如黍者灸之尤效亦有數日色尚未赤腫尚不起痛不甚膿不作者尤宜多灸勿拘日期更服甘溫托裡藥切忌寒涼之劑或瘰肉不腐亦用桑木灸之若脉數發熱而痛者發于陽也可治脉不數不發痛者發于陰也難治不痛最惡不可視為常疾此症不可不痛不可大痛煩悶者不治大抵發背腦疽大疔懸癰脫疽脚發之類

皆由膏粱厚味盡力房勞七情六淫或丹石補藥精
虛氣節所致非獨因榮衛凝滯而生也必灸之以拔
其毒更辨其因及察邪在臟腑之異虛實之殊而治
之庶無誤也

一男子初生如粟悶痛煩渴便秘脉數實此毒在臟也
謂宜急踈去之以絕其源使毒不致外侵彼以為小
恙乃服尋常之藥後大潰而歿

一老婦患之初生三頭皆如粟腫硬木悶煩躁至六日

其頭甚多脉大按之沉細為隔蒜灸及托裡漸起發
尚不潰又數劑內外雖腐惟筋所隔膿不得出致脹
痛不安謂須開之彼不從後雖自穿毒已攻深矣亦
歿大抵發背之患其名雖多惟陰陽二症為要若發
一頭或二頭焮赤腫高頭起疼痛發熱為癰屬陽易
治若初起一頭如黍不腫不赤悶痛煩躁大渴便秘
睡語咬牙四五日間其頭不計數其瘡口各含如一
粟形似蓮蓬故名蓮蓬發積日不潰按之流血至八

九日或數日其頭成片所含之物俱出通結一衣揭去又結其口共爛為一瘡其膿內攻色紫黯為疽屬陰難治脉洪滑者尚可沉細尤難如此惡症惟隔蒜灸及塗烏金膏有效凡人背近脊并胛皮裡有筋一層患此處者外皮雖破其筋難潰以致內膿不出令人脹痛苦楚氣血轉虛變症百出若得自潰多致不能去似此堅物待其自潰不亦反傷非血氣壯實者救必須開之兼以托裡常治此症以利刀剪之尚不能去似此堅物待其自潰不亦反傷非血氣壯實者

金匱要略卷之二十一
卷五十一
未見其能自潰也

一男子年逾五十患此色紫腫痛外皮將潰寢食不安
神思甚疲用桑柴灸患處出黑血即寤睡覺而諸症
如失服仙方活命飲二劑又灸一次膿血皆出更二
劑腫痛大退又服托裡消毒散數劑而斂夫瘡勢熾
甚宜用峻劑攻之但年老血氣衰弱况又發在肌表
若專于攻毒則胃氣先損反致誤事

一婦人發熱作痛專服降火敗毒藥潰後尤甚煩躁時

嗽小便如淋皆惡症辭不治果死大抵瘡瘍之症五善之中見一二善症可治七惡之內見一二惡症者難治若虛中見惡症者不救實中無惡者自愈此症雖云屬火未有不由陰虛而致者故經云督脉經虛從腦而出膀胱經虛從背而出豈可尚泥于火

趙太守患此腫堅不澤瘡頭如粟脉洪大按之則澁經云骨髓不枯臟腑不敗者可治然腫硬色天堅如牛領之皮脉更澁此精氣已絕矣不治亦死

圖經云薜荔治背癰頃年寓宜興縣張鎮有一老舉人
教材學年七十餘忽一日患發背村中無醫藥急取
薜荔研爛絞汁和蜜飲數升以其滓傅瘡上後以他
藥傅貼遂愈醫者云其本蓋得薜荔之力乃知圖經
所載不妄

本草

郭戶為予言鄉里有善治發背癰疽者于瘡上灸之多
至二三百壯無有不愈但作艾炷小則人人不畏灸
灸多則效矣蓋得此法也然亦不必泥此近有一醫

以治外科得名有人發背瘡大如椀有數孔醫亦無藥可治只以艾遍敷在瘡上灸之久而方痛以瘡上皆死肉故初不覺疼也旋以藥調治之愈蓋出于意

表也

方百乙

治發背初作取水蛭置腫上飲血腹脹自落別換新者
脹蛭以新水養之即活矣吳內翰備急方云其蛭祖
仁一日忽覺背瘡赤腫如椀大急用此治之至晚遂

安

方百乙

昔嚴州一通判忘其名母病發背祈禱備至夜夢呂真人服青衣告之曰公極孝故來相告以方更遲一日不可療矣通判公急市藥治之即愈用瓜萋五個取子細研乳香五塊如棗子大亦細研以白沙蜜一觔同煎成膏每服三二錢溫酒化下大治發背諸惡瘡日進二服無不立效楊王得此方家人凡百瘡毒依此治之皆效遂合以施人無不驗者漏瘡惡核並皆治之此即鄭府朱保義所說神妙方是也

醫說續編

立齋治張錦衣年踰四十患發背心脉洪數勢危劇經云心脉洪數乃心火熾甚諸痛痒瘡瘍皆屬心火心主血心氣滯則血不行故生癰也騎竹馬灸穴是心脉所由之地急灸之以瀉心火隔蒜灸以拔其毒再以托裡消毒果愈

鄭大理伯興髀骨患疽背左右各一竟背重如負石兩臂如墜瘡頭皆大如豆許其隱于皮膚如粟者不計其數瘡色黯而不起已七十口乾作渴診之脾胃脉

甚虛彼云昨日所進鬻食今尚不消作酸意此難治之症因與素善者籌其治法以隔蒜灸二十餘壯其背與臂動覺少便隨用六君子湯加薑汁炒山梔及吳茱萸連服數劑吞酸遂止飲食少進但口乾瘡仍不起色亦不赤亦無膿復如前法灸二十餘壯背臂頗便瘡遂發其時適秋又投大補之劑及生脉散以代茶飲

留都鄭中翰仲夏患發背已半月瘡頭十餘枚皆如粟

許漫腫堅硬根如大盤背重如負石即隔蒜灸五十
餘壯其背頓輕彼因輕愈不守禁忌三日後大作瘡
不起發喜得痛用活命飲四劑勢少退用香砂六君
子湯四劑飲食少進彼恃知醫自用敗毒藥二劑飲
食益少口流涎沫若不自知此脾虛之甚也每用托
裡藥內參芪各三錢彼密自揀去大半後雖用大補
藥加薑桂亦不應遂令其子以參芪各一斤歸朮各
半斤乾薑桂附各一兩煎膏一罐三日飲盡涎頓止

腐頓潰食頓進再用托裡健脾藥腐肉自脫而愈

張侍御背患瘡三枚皆如粟彼以為小毒服清熱化痰之藥外用涼藥敷貼數日尚不起色黯不焮胸中氣不得出入其勢甚可畏連用活命飲二劑氣雖利膿清稀瘡不起欲用補劑彼泥于素有痰火不受參朮之補因其固執陽以敗毒之劑與視之而陰以參朮歸朮各五錢薑桂各二錢服二劑背覺熱腫起腐肉得潰方信余言始明用大補藥乃愈

南都聘士葉公玉表兄聶姓者患發背時六月腐肉已去瘡口尺許色赤而焮發熱不食欲嘔不嘔服十宣散等藥自謂不起請決之其脉輕診則浮而數重診則弱而澁此潰後之正脉然瘡口開張血氣虛也欲嘔而不嘔脾胃虛也色赤焮腫虛火之象也尚可治遂與十全大補湯加酒炒知柏五味麥冬及飲童便飲食頓進肌肉頓生服至八劑瘡口收如粟許又惑于人言又服消毒藥二劑以為消餘毒反發熱昏憤

急進前藥又二十餘劑乃愈後兩月因作善事一晝
夜不睡致勞發熱似睡不睡與前藥二劑愈加發熱
飲食不進惟飲熱湯後以前藥加附子一錢二劑愈
石武選廉伯患發背內服防風通聖散外敷涼藥汗出
不止飲食不進且不寐瘡盈尺色黯而堅硬按之不
痛氣息奄奄此陽氣已脫脉息如無急隔蒜灸時許
背頓輕四圍高不知痛中央肉六寸許一塊已死服
香砂六君子湯一劑翌日復灸一次痛處死肉得解

令砭去薛歸後又為他醫所惑未砭其血復凝又敷
辛溫活血藥翌日依言砭之出黑血二盞許背強頓
去以前藥加薑桂服一鍾即劇睡覺來肢體少健但
飲食仍不思吞酸仍有瘡仍不痛彼以為陰毒乃如
此赤曰此氣血虛極寒邪淫于內無陽營于患處故
肌肉死也非陰毒若陽氣一回胃氣即省死肉即潰
可保無慮矣以前藥二劑各加薑桂附子二錢服之
畧進米飲精神復舊患處覺熱脉畧有力此陽氣畧

回矣是日他醫謂瘡瘍屬火症况今暑令乃敷芙蓉
根等涼藥即進粥二椀服消毒藥死肉即潰意芙蓉
乃寒涼之藥與脾胃何益飲食即時而進消毒乃辛
散之劑與陽氣何補死肉即時而潰此蓋前桂附之
功至而脾胃之氣省故飲食進陽氣旺死肉腐也苟
虛寒之人若內無辛熱回陽之藥輒用寒涼攻毒之
劑豈可得而生耶若以為火令屬陽之症內有熱而
用辛溫補益之劑豈不致死而反生耶殊不知此乃

捨時從症之治法也

一男子發背膿始潰腫未消已十七日脉微而靜曰膿
毒未盡脉先弱此元氣虛宜補之否則後必生變彼
惑于人言乃服敗毒藥腐肉雖潰瘡口不完忽腹中
似痛後去白垢肛門裡急復救治曰此裡虛然也非
痢非毒當溫補脾胃為善因諸瘍醫皆以為毒未盡
仍服敗毒藥而死

賀少參朝儀背胛患疽大如豆粒根畔木悶不腫肉色

如常曰此氣虛毒甚之症雖用補劑亦不能收斂先用活命飲二劑背強少和又二劑疽少赤用大補劑瘡出黑血杯許繼有鮮血微有潰膿曰可見氣血虛及矣他醫以為屬氣血有餘之症密用攻毒藥一鍾即嘔逆腹內陰冷而死

少司寇周玉巖背患疽在胛已四日瘡頭如粟重如負石堅硬不起自以為小恙外敷涼藥內服連翹消毒散去後四次形體倦怠自汗盜汗口乾無寐曰瘡不

宜硬色不宜黯周曰初起時赤而軟自前二藥以致
如此曰凡瘡外如麻內如瓜毒結于內非小患也脉
輕診似數按之則微未潰脉先弱主後難斂因與卿
雅不能辭遂隔蒜灸二十餘壯乃知痛又十餘壯背
覺少和服六君子湯加黃芪藿香當歸麻黃根浮麥
二劑渴止汗少斂瘡色仍黯堅硬又服辛溫活血之
藥瘡始起渴止汗斂所結死血得散良久汗復出口
復乾又服數劑外皮雖潰清膿尚未潰通於內膿欲

走別處彼用藥圍之曰裡虛而膿不能潰于外圍藥
逼毒入內至十二日脉浮按之如無再用前藥一劑
加薑桂服之即安寐又二日脉忽脫再于前藥加附
子七分服二劑乃曰背今日始屬吾也形體亦健頗
有生意因先日有言難以收斂屢更醫雜用清熱解
毒及敷涼藥遂致裡虛元氣下陷去後如痢用治痢
消毒藥而死

姜舉人發背十日正腐潰作渴喜熱湯飲此中氣虛不

能先津液而口乾宜預補之否則不能收斂後瘡口
故不收猶以毒為未盡用敗毒藥兩月瘡口不完清
利腹痛又服清涼之藥而死

王序班發背元氣虛弱用托裡藥而始起用大補藥而
始潰彼惑他議敷涼藥致腹內不和裡急後重去後
如痢大孔作痛曰此裡虛非痢仍用敗毒治痢藥而死
一男子四十餘歲發背未潰即作渴脉數腫高色紫面
赤小便如膏以加減八味丸料加酒炒知柏為丸每

日空心并食前以童便送下百丸用八珍湯加五味
麥冬黃芪酒炒知母赤小豆食遠煎服逐日又以童
便代茶飲之渴止瘡潰而愈吾治得生者此人耳

汪夫人患發背用敷藥冷逼胸內欲嘔急令洗去用托
裡藥尋愈劉太宰紫巖太夫人發背元氣不足用托
裡藥而起王安人發背正潰時欲速效俱敷草藥即
日而死

劉大尹年將五十陸路赴京兼喪其妻發背盈尺中六

寸許不痛發熱口乾惡寒自汗少食大便不禁且氣
促脉浮大按之空虛用補中益氣湯加半夏茯苓四
劑又隔蒜灸之彼云背重已去形氣少健但吞酸前
日所進飲食覺仍在腹又以前藥加薑桂服二劑飲
食少進吞酸已止始得睡瘡且不痛不潰疑為陰症
曰此陽氣虛不能營于患處故所患肉死而不痛不
潰也若胃氣回飲食進死肉即潰矣仍服前藥六劑
飲食漸進患處漸潰脉有力曰此陽氣回矣後惑于

他醫云必服飛龍奪命丹出汗為善遂進一服汗大
出三日不止復請治曰汗多亡陽無能為也強曰諸
書云汗之則瘡已豈為患後果死東垣曰瘡瘍因風
熱鬱于下其人多怒其瘡色赤腫高結硬而痛左關
脉洪緩而強是邪客于血脉之上皮膚之間故發其
汗而通其滯衛則邪氣去矣謙甫治瘡瘍冬月脉浮
緊按之洪緩乃寒覆皮毛鬱遏經絡熱不得升聚而
赤腫蓋冬月乃寒氣收斂皮膚緻密腠理汗不得出

而設也况發汗乃陰盛陽虛邪不能自出必得陽氣
泄汗乃出是助陽退陰之意也且前症未潰其氣血
既虛潰後氣血愈虛凡瘡雖宜汗然元氣虛者不宜
况所見之症俱屬不足豈可汗耶

留都機房紀姓者背瘡胃氣虛用溫補藥而飲食進大
補藥而瘡腐愈後患腿痛用養血化痰之劑少止彼
嫌功緩他醫以為濕熱服麻黃左經湯一劑汗出不
止曰必發瘧而死已而果然

王德之患發背脉浮數按之則澀大便五六日不行腹
不加脹曰邪在表不在裡但因氣血虛飲食少故大
便不行非熱結也宜生氣血為主彼泥積毒在內用
大黃之藥下之遂連瀉三四次更加發來日又服一
劑瀉遂不止飲食不化吃逆不絕手足皆冷診之脉
已脫辭不治其子曰瀉之能為害乎曰服利藥而利
不止者死不當瀉而瀉令人開腸洞泄不禁者死下
多亡陰者死曰瘡瘍雖積毒在臟腑治法當先助胃

氣使根本堅固參以行經活血時宜之藥非專用大黃也今病在表而反以峻利之劑重奪其陰可乎哉故曰表病裡和而反下之則中氣虛表邪乘虛而入由是變症百出雖云脉浮數邪在表屬外因當用內托復煎散其間黃芩蒼朮亦不敢用脉沉實邪在內屬內因當用內疎黃連湯其中大黃檳榔亦不敢用况浮數澁三脉皆主血氣俱虛邪既在表而反用峻利之劑重瀉其裡誅伐無故不死何俟

卷五十一
一縣尹背瘡竟背腐潰色黯重若負石甚危喜飲食頗
進用紅桃散色漸赤負漸輕再用而肌生更服托裡
藥而愈蓋此大毒症非峻藥莫能治內用砒故用攻
毒有效

平氏室患發背以托裡消毒藥二十餘劑而潰因怒頓
吐血五六椀許氣弱脉細此氣血虛極也遂令服獨
參膏斤許稍緩更以參芪歸朮陳皮炙草三十餘劑
瘡口漸合設投以犀角地黄湯沉寒之藥鮮有不誤

徐符卿年逾四十患發背五日起肉色不變脉弱少
食大便不實以凡疽未潰脉先弱難于收斂用托裡
消毒二劑方起發彼惑一嫗言貼膏藥服攻毒劑反
盛背如負石復請治遂以隔蒜灸三十餘壯云背不
覺重但痒痛未知更以托裡藥知痛痒膿清仍以前
藥倍加參芪佐以薑桂膿稍稠又為人惑外用猪腰
子貼抽膿血內服硝黃劑遂流血五六椀許連瀉十
餘行腹內如冰飲食不進不得已速診之脉遽脫已

不可為矣蓋其症屬大虛不足之甚雖一於溫補猶恐不救况用攻伐之劑不死何俟

顧浩室年逾四十患發背治以托裡藥而潰忽嘔而瘡痛胃脉弦緊彼以為餘毒內攻東垣云嘔吐無時手足厥冷臟腑之虛也丹溪云潰後發嘔不食者濕氣侵于肉也又云膿出而反痛者虛也今胃脉弦緊木乘土位其虛明矣欲以六君子湯加酒芍砂仁藿香治之彼自服護心散嘔愈甚仍用前藥更以補氣血

兩月而愈大抵濕氣內侵或感穢氣而作嘔必喜溫而脈弱熱毒內攻而作嘔者必喜瀉而脈弱熱毒內攻者必喜涼而脈數必須辨認明白

鄭揮使年逾五十患發背形症俱虛用托裡藥而潰但有腐肉當去彼懼不肯延至旬日則好肉皆敗矣雖投大劑毒甚竟不救古人謂壞肉惡于狼虎毒于蜂螫緩去則戕賊性命信哉

張宜人年逾六十患發背三日肉色不變頭如粟許肩

背加重寒熱飲冷脉洪數陳良甫云外如麻裡如瓜
齊氏云增寒壯熱所患必深又云肉色不變發于肉
也以人參敗毒散二劑乃隔蒜灸五十餘壯毒始發
背始輕再用托裡藥漸潰氣血虛甚而作渴參芪歸
地等藥渴亦止彼欲速自用草藥菴患處毒氣復入
遂不救嘗見老弱者患此瘡頭不起或堅如牛領之
皮多不待潰而死有潰後氣血不能培養者亦死凡
瘡初潰毒正發越宜用膏藥吸之參芪等藥托之若

反以藥遏之使毒氣內攻者必不救

王太守宜人患發背膿熟不開昏悶不食此毒入內也
斷不治強之針膿椀許稍蘇須臾竟亡大抵血氣壯
實膿自涌出老弱之人血氣枯槁必須迎而奪之順
而取之若毒結四肢砭刺少緩腐潰深大亦難收斂
痛結于頰項胸腹緊要之地不問壯弱急宜針刺否
則難治

郭職坊名璉背瘡潰陷色紫舌卷謂下陷色紫主陽氣

脫舌卷囊縮肝氣絕遂辭之經曰舌卷囊縮此筋先
死庚日篤辛日死果至立秋日而歿

姚應鳳治撫軍喻思恂駐師溫州拒海賊劉香受降有
日毒發背間劇甚應鳳至封腐肉二大器洞見五臟
隨傳以丹藥越二日靡平開轅門坐受降撫軍喜深

德之

仁和
縣志

王洪緒治木瀆談姓婦患背瘡如椀初起色白近已轉
紅痛甚時值三伏與陽和湯或曰暑天何用麻桂熱

劑曰此陰症也又云患色轉紅陰已回陽乃立令煎服不一時痛止連進四服症減其七餘三分有膿不痛而潰五日收功

錢國賓治湖州三官廟僧大乘發背長二尺濶八寸深寸許中間如蜂窩二百餘頭流膿痛極欲死乃半身發也此僧素喜煇灸多動肝氣其脉浮洪可救以新槐子一合生白礬一錢盛錫壺內冲滾水二三椀再以壺炖水內煮十數滾令味盡出陸續飲之

至五七壺痛止外用綠膏藥取松香一斤五兩燒酒五斤微火煮乾為度傾冷水內以手捻松子百次去水酒濕氣用全蠋二十一個蜈蚣二十一條真蟾酥五錢乳香沒藥各三錢銅綠八錢各另研方以松香化開入香油少許試老嫩成膏待松香冷定方入細藥攪勻盛磁罐內隔水炖攤一日一換每次下腐肉一層生肌如石榴子廿日收口此膏妙在一長齊平不比別膏自周圍長至豆大難

收口也凡冤業大毒一切通治

續名醫類案卷五十一